

NEHEMAYA labaar

Ki jiin Nehemaya gbouŋ na po

Gbouŋ na beerit bianjinba ki Nehemaya din nyii boorganu tiŋ ni ki jen, a wun kpaŋ Israel niib na ki sommib ki bin ŋamm maa Jerusalem doo joona nae.

¹ Mɔmaan nba ki Nehemaya, wunba tee Hakalia bija na din sobe na.

Nehemaya baka nba be Jerusalem po bianjinba

Artaserses, wunba din tee Peesia kpanbar na naan dinu bina piinlee ni, ŋmaarik nba ki bi yir Kislef na ni, ki min Nehemaya be Susa nba tee digbansaakar na ni. ² N din boi Hanani nba tee n ninjamm na yeŋ, nan jaleeb nba nyii Juda ki baar na, ki jiin Jerusalem nan ti leeb Juu teeb nba din nyii Babilonn ki ŋmat na po. ³ Ki bi betin nan binba daan tinn ki jen be bi dantiŋ ni na be mabir ni bonchiann, ki boorganu nba din kɔɔ ki kpiab na ki chɔrimmi. Bi bia din betin nan Jerusalem joona na yeer ki dɔɔ tiŋ nie, a ki li gana nba ki bi din joor muu na, bi ki ŋammir, laa nyii li yoowa.

⁴ Maa gbat linba na kur yoo nba, ki n kar bui. N din jii daa bonchiann ki lor mɔb ki fabin, ki miar Yennu a, ⁵ “N Yomdaano Yennu nba be Yendouŋ ni, a tee Yenjaanne, ki ti tiina janmaanii. A dia a mɔlora fanu nan binba loona ki bia saak a mɔb. ⁶ Yennu, gotirin ki gbiint n miaru, nan maa

mei yonnu nan nyiok ki teen a toontunna nba tee Israel teeb na. N pak kat nan timm Israel teeb tun yanbomma. Min nan n yeejamm tun yanbomma. ⁷ Ti tun bonbiir ki turawa, ki ki tun nan faa wannit bianjinba na. Ti ki dia sennii nba ki a turit, ki li nyii a toontunna Moses boor na. ⁸ Mɔtana, tiat linba ki a din yet Moses na a, 'Li-i tee yimm Israel teeb na ki sak n mɔb, n saa yatie, ki yin koo digbanlia ni. ⁹ Nnaan li-i tee ki i jen n boor, ki tun linba ki n senn na, maa lek bo yati tingbouŋ na kur po na, nnaan n saa te yin jen siaminba ki n gann maa yii jiantirin na.'

¹⁰ "N Yomdaano, a toontunnae na, a tiŋŋ niib, ki a jii a yiikoo nan a panchiŋ na ki tinnib.

¹¹ Mɔtana, gbiintir min nan a toontunlia nba kur loon tin jianta na miaru. Turimin nyannu dinna, ki te kpanbar na-ii mɔk ninbatinu nanin."

Mine din tee kpanbar na daturto.

2

Bianjinba ki Nehemaya saan Jerusalem

¹ Li nmaarii nanna poorpo, dasiar ki kpanbar Artaserses tan di jeet, ki n jii daan ki turo. U din daa ki ban lan ki n gorii ninbanummi. ² Nanne ki u boi a, "Bee ki a mantik gorii ninbaatiri? A ki yiar kaa, nnaan a kii mɔk parpeenne."

Ki li soorin janmaanii, ³ ki n jiin a, "Chanbaa, Yennu n tura manfofoouk. Nlee ki n kii gorii ninbaatiri, li-i tee doo nba ki bi din pii n yeejamm na ji tee langbent mɔtana, ki li gana bia dii muuwa?"

⁴ Ki kpanbar na boin a, "A loon bee?"

Ki n miar Yennu nba be Yendouŋ ni na, ⁵ ŋaan yet kpanbar na a, “Chanbaa, li-i tee ki a par mei n paak, ki a saa sak nanin, fan ŋaan man saan Juda tiŋ ni, doo nba ki bi din pii n yeejamm na, ki saa ŋamm maa doo maŋ.”

⁶ Ki kpanbar na sak nan wun tun maa boi linba na, ki poobat na kar bookɔ; ki kpanbar na boin maa saa jii yoo bianinba ki saan, nan maa tan saa jen yoo nba; ki n betɔ.

⁷ Tɔn, n din yetɔ maa wun sommin ki turin gbant ki n saan tur toontunna saakab nba be Yufrates yonbaa po yent na ni, ki bin chabin ki n saan Juda tiŋ ni. ⁸ N bia din yetɔ maa wun turin gbouŋ ki n saan tur Asaf, wunba guu kpanbar foor na, ki betɔ ki wun turin taabii ki tin ŋamm ŋapaaruk nba be Yenjiantu ŋasaakak boor na tammɔi, ki bia ŋamm doo na joona, nan ŋaak nba ki n saa kɔɔ li ni na. Ki kpanbar na turin linba kur ki n loon, kimaan Yennu be nanin.

⁹ Kpanbar na din turin kunkɔnkɔnna saakab, nan kunkɔnkɔnna, ki bi jak taanii ki chianin saan Yufrates mɔkir yonbaa po. Leŋe ki n din tur tiŋ na yudamm gbant nba ki kpanbar turin na. ¹⁰ Ŋaan Sanbalat, wunba din nyii Bef Horonn doo ni na, nan Tobia wunba tee toontunna saakɔɔ, ki nyii Amonn teeb yent ni na nba gbat nan sɔɔ baar a wun tun toonn ki lin ŋamm Israel teeb na, ki bi wutoa doo.

¹¹ Ki n saan Jerusalem, ki daa ŋantaa na kur ¹² n din ki bet sɔɔ linba ki Yennu wannin a n tun ki tur Jerusalem na po. Tɔn, ki n tan fiir tansuuni ki jii n leeb waan, ki ti nyii nanyer. Bonkobuk nba ki ti din jii u tee boŋ nba ki n jakɔ nae. ¹³ N

din fiir doo na ni nyioko, ki tokin nyii doo na tammob nba ki bi yir Baauk po tammob na, ki li be yonbaa po, ki bia gar saan niidiitu po, ki gar baar nyuntonn nba ki bi yir Waauk Nyuntonn na, ki saan tammob nba ki bi yir Tanpenn Tammob na. Maa saa na, ki n got la doo na joona nba baa na, nan li gana nba ki muu dii ki biirir na. ¹⁴ Tɔn, n din tokin doo na yondo poe, ki saa li niiganj po, ki baar tammob nba ki bi yir Nyuntonn Tammob na, ki gar baar Kpanbar Nyun boor. Boŋ nba ki n jak na din ki la yiar nan wun gar tangbiina na ni. ¹⁵ Nanne ki n jakɔ sik Kidronn baauk na ni, ki lin gorii joonn na, ki tan ŋmat tokin sɔnu nba ki n bo baar na, ki tan kɔɔ tammob nba ki bi yir Baauk Tammokɔkir na, ki kɔɔ doo na ni.

¹⁶ Toontunna saakab na, bi sɔɔ din ki mi maa saan siaminba, koo maa tun linba, ki tan tuu li yoo. N din ki yet siar ki tur n leeb Juu teeb na, li mannteeb nan tɔɔndamm nan toona saakab, koo wunba kur saa pukin toona na tumu ni. ¹⁷ Tɔn, ki n ji yetib a, “Gotir man taa be daamii nba ni na, kimaan Jerusalem ji tee langbente, ki li joona yeera. N̄aant ki tin ŋamm maa doo maŋ joona ki nyi fei ni.” ¹⁸ Ki n ji betib Yennu nba be nanin, ki bia sommin bianjinba, nan kpanbar na nba yetin linba.

Ki bi jiin a, “N̄aant ki ti ŋamm maa.” Ki bi teen siir a bin piin bi toonn.

¹⁹ Ki Sanbalat nan Tobia nan Arab niro nba ki bi yiu Gesem na nba gbat taa lor a tin tun linba na yoo nba, ki bi laat, ŋaan yet a, “I dukii a i tuun bee? I loon yin kɔn nan kpanbar nae-e?”

20 Ki n jiin a, “Yennu nba be Yendouŋ ni nae saa turit nyannu. Ti tee u toontunnae, ki yaa ti piin kii maa. N̄aan yimm n̄arin, i nuu kaa faar nba be Jerusalem na ni, ki i bia ki pukin li kaar ni.”

3

Bianjinba ki bi n̄amm maa Jerusalem jonn

1 Baa din maa doo na jonn bianjinbae na. Eliasib, wunba din tee mannteeb yudaano na, nan u mannteeb din n̄amm maa Pei Tammob na jonn, ki koon li gana ki jii jiin tur Yennu. Bi din jii jonn nba saa difoouk nba ki bi yir Kobik na, nan difoouk nba ki bi yir Hananel na, ki jiin tur Yennu.

2 Ki Jeriko jab maa bokir nba waa na.

Ki Sakur, wunba tee Imri bija na maa bokleer.

3 Hasena naakuuk ni teeb din maa Janii Tammob na jonn. Bi din chaan ganchaatae, ki koon li gana nan gankpata.

4 Ki Meremof, wunba tee Yuria bija, n̄aan tee Hakos yaaboonn na maa bokir nba waa na.

Ki Mesulam, wunba tee Berekia bija, n̄aan tee Mesesabel yaaboonn na maa bokir nba waa na.

Ki Sadok, wunba tee Baana bija na maa bokir nba waa na.

5 Ki jab nba nyii Tekoa na maa bokir nba waa na, n̄aan Tekoa toondamm na din yēt doo toonn nba ki toonn saakab sennib a bin tun nawa.

6 Joyada, wunba tee Pasea bija na, nan Mesulam, wunba tee Besodeya bija na, din n̄amm maa Jesana Tammob na jonn. Bi din chaan ganchaata, ki koon li gana nan gankpata.

⁷ Melatia, wunba nyii Gibeonn na, nan Jadonn, wunba nyii Meronof na, nan jab nba nyii Gibeonn nan Mispa na, din maa bɔkir nba waa na, ki saa tuu Yufrates yonbaa po yent yudaanɔ ɲaak.

⁸ Ki Usiel, wunba tee Har-haya bija, ki tee salima saauk kurtɔɔ na, maa bɔkir nba waa na.

Ki Hanania, wunba ɲamii tulaarii na maa bɔkir nba waa na, ki saa tuu joonn nba ki bi yir Joon-yaruɲ na.

⁹ Ki Refaya, wunba tee Hur bija ki dia Jerusalem yent bɔkir na maa bɔkir nba waa na.

¹⁰ Ki Jedaya, wunba tee Harumof bija na, din maa bɔkir nba waa, ki kpia nan u mɔɲ ɲaak na.

Ki Hatus, wunba tee Hasab-neya bija na maa bɔkir nba waa na.

¹¹ Ki Malkija, wunba tee Harim bija na, nan Hasub, wunba tee Pahaf Moab bija, din lakin maa bɔkir nba waa na, nan difoouk nba ki bi yir Bonpur-diiuk na.

¹² Ki Salum, wunba tee Halohes bija ki dia Jerusalem yent bɔkleer na maa bɔkir nba waa na. (U bonpoie din sommo ki u tun toonn na.)

¹³ Hanunn nan Sanoa doo ni niib din ɲamm maa Baauk Tammɔb na. Bi din chaan ganchaata, ki kɔɔn li gana nan li gankpata, ki bia ɲamm joonn na, ki li yarimu tee taakaabii kobii ɲanɲmu, ki saan tuu Tanpenn Tammɔb.

¹⁴ Malkija, wunba tee Rekab bija nba dia Bef Hakerem yent na, din ɲamm maa Tanpenn Tammɔb na, ki chaan ganchaata, ki kɔɔn gana nan gankpata.

15 Ki Salum, wunba tee Kol-hose bija ki dia Mispa yent na, namm maa Nyuntonn Tammob na. U din pin tammob na yur paake ki namm senn li gana, ki koon gankpata. U bia din maa joona na ki nyii Sela nyun boor ki gar naan kpaab na boor, ki saa tuu sonsau nna; ki sonu manj nyi siaminba ki bi yi Defid doo na.

16 Ki Nehemaya nba tee Asbuk bija ki dia Befsur yent bokir na maa bokir nba waa na, ki saan tuu Defid kaauk nan nyundoonn na, ki dian kunkonkonna njaak na.

Ki jin Liifai teeb nba din maa joonn na po

17 Liifai teeb nae din namm maa joonn na boklia nba waa na:

Rehum, wunba tee Bani bija nae din maa bokir nba waa na.

Ki Hasabia, wunba dia Keila yent bokir na set u yent paak, ki maa bokir nba waa na.

18 Ki Bafai, wunba tee Henadad bija, ki dia Keila yent bokleer na maa bokir nba waa na.

19 Ki Eser, wunba tee Jesua bija, ki dia Mispa doo na maa joonn nba be tob tiat diiuk toonn po na, ki saan tuu siaminba ki joonn na gont.

20 Ki Baruk, wunba tee Sabai bija na maa bokir nba waa na, ki saan tuu mannteeb yudaano Eliasib njaatammokokir.

21 Ki Meremof, wunba tee Yuria bija ki tee Hakos yaaboonn na maa bokir nba waa na, ki saan dian Eliasib njaak kpinj.

Ki jin mannteeb nba din maa joonn na po

22 Mannteeb nba nae din namm maa joonn na bokka nba waa na:

Mannteeb nba din koo kpia Jerusalem nae din maa bokir nba waa na.

²³ Ki Benjamminn nan Hasub maa bokir nba waa ki be bi nei toonn po na.

Ki Asaria nba tee Maseya bija ki tee Anania yaaboonn na maa bokir nba waa, ki be u njaak toonn po na.

²⁴ Ki Binnui, nba tee Henadad bija na maa bokir nba waa na, laa nyii Asaria njaak ki saan tuu siaminba ki joonn na gont.

²⁵⁻²⁶ Palal, wunba tee Usai bija na din maa bokir nba waa na, laa nyii joonn na nba gont siaminba, nan difoouk nba be naan njaak nba be paapo na, ki kpia nan guuteeb dindouj na.

Ki Pedaya, wunba tee Paros bija na maa bokir nba waa ki jiin yondo po, ki li kpia Nyun Tammob na, nan difoouk nba kpia Yenjiantu nasaakak na, (li din kpia doo na bokir nba ki bi yi Ofel nae, siaminba ki Yenjiantu nasaakak toontunna be na.)

Ki jiin tanmaaleeb na po

²⁷ Jab nba nyii Tekoa nae din maa bokir nba waa na, bi taar munlee nie na; bi din nyii difoouk nba kpia Yenjiantu nasaakak na poe, ki maa ki saa tuu joonn nba kpia doo man bokir nba ki bi yir Ofel na.

²⁸ Manntesiab din taan ki maa bokir nba waa na, laa nyii Taanii Tammob na, ki saan tuu niigan po, ki soo kur maa bokir nba be u njaak toonn po.

²⁹ Sadok, wunba tee Imer bija na din maa bokir nba waa ki be u njaak toonn po na.

Ki Semaya, wunba tee Sekania bija, ki guu yondo po tammob na maa bokir nba waa na.

³⁰ Ki Hanania, wunba tee Selemia bija, nan Hanunn, wunba waa Salaf bonjai banloob ni na maa bokir nba waa na, bi taar munlee nie na.

Ki Mesulam, wunba tee Berekia bija na maa bokir nba waa ki be u njaak toonn po na.

³¹ Ki Malkija, wunba tee salima saauk kurtoo na maa bokir nba waa na, ki saan tuu njaak nba ki Yenjiantu nasaakak toontunna nan kpinkpenta be na, ki li kpia Yenjiantu nasaakak tammob nba ki bi yir Guura Tammob na, ki li kpia diiuk nba be niigan po ki jiin yondo po jonn na gungont boor na.

³² Ki salima saauk kurteeb na, nan kpinkpenta na maa bokir nba joont na, laa nyii gungont boor diiuk na, ki saan tuu Pei Tammob na.

4

Bianjinba ki Nehemaya nyann u datai

¹ Sanbalat nba gbat nan timm Juu teeb namii maa jonn na yoo nba, ki u wutoor doo, ki u piin ki sukiit, ² ki yet u leeb nan Samaria kunkonkonna na numm ni a, “Juu teeb nba tee bonbutimii na dukii a bi tuun bee? Bi lor a bin namm maa doo nae-e? Bi dukii nan bi marun nae saa te ki bin gbenn toonn na dayenn koo-o? Bi saa fit nyinn tanmaakara tangbiinkpeka nba dii muu na niwa-a?”

³ Ki Tobia, wunba tee Amonn niro ki see len ki kpiau na mun bia yet a, “Bi saa fit maa joonboorbee? Lunlonn gbaa saa fit tut luwa.”

⁴ Ki n miar Yennu a, “Yennu, gbiintir baa sukiit bianjinba. Naant ki bi sukut na n nmat bi yura paak, ki njaan siab n fat bi mokint kur, ki bia

soorib ki saan namm boorganu tinj ni, ki teemm yommii. ⁵ Bi toonbiit nba ki bi tuun na, a daa nyikin chabitibi, ki bia daa tammit bi yanbomm na po, kimaan bi sukii timm nba maa nae.”

⁶ Tɔn, ki taa tukin jonn na maanu, li ki wei kaawa ki ti kɔɔ li sinsuuk ni, kimaan niib na ninbina din mon toonn na paak.

⁷ Ki Sanbalat nan Tobia nan Arab teeb nan Amonn teeb nan Asdod teeb na nba gbat nan ti ηamii maa Jerusalem jonn, ki li saa fanu, ki jonn na yiar mubint yian yian na, ki bi wutoor mantik doo, ⁸ ki bi kur taan leeb ki lor a bin baar lek Jerusalem, ki ηmatir n baar. ⁹ Ki ti miar Yennu, ηaan ji te ki jab guu yonnu nan nyioɔk.

¹⁰ Juda teeb na din tuu mɔk bi yan ki yiin a: “Ti jii jik-kpiata ki baka.

Tangbiina na yabit nan tin jiiwa,

ki nlee ki ti saa maa jonn na dinna?”

¹¹ Ti datai na dukin nan ti kan labi, koo ti kan bann baa tuun linba, see ki bi tan baar ki kpiit, ki bia gɔɔr toonn nba ki ti tuun na. ¹² ηaan yoo n tuu yoo, Juu teeb nba kɔɔ nan ti datai man na tuu baar ki tan wannit ti datai na nba lorin linba ti paake. ¹³ Nanne ki n tur niib na jukbanjai nan kpana nan tɔrbana, ki sennib naakuuk naakuuk, jonn na lanpoor, siaminba ki bi daa ki maa gbenn na.

¹⁴ N din la nan niib na para biire; ki n yet ηamm nan bi tɔɔndamm nan bi toontunna saakab a, “I daa tiin ti datai na janmaanii. Tiat man Yennu nba tee Yenjaann, ki bia tuun bakitnauj toona bianjinba, ki kɔn ki tur i doo teeb nan i waas nan i ηaapoob nan i ηei.” ¹⁵ Ki

ti datai na gbat nan ti bann linba ki bi lorin nawa, ki bi ji bann nan Yennu biir bi lora maɲa. Tɔn, ki ti kur ji nmat saan ki n̄mii maa joona na.

¹⁶ Laa din nyii li yoo maɲ, n jab na bɔkir din tuune, n̄aan ki bɔkleer see ki guut, ki lia kut tɔbliata, ki dia kpana nan naagbankɔɲa nan tɔrbana; ki ti tɔɔndamm na din teen niib ¹⁷ nba n̄mii maa joonn na bi sommir. Binba lek din jikit tanmaa bona na din tuun niyeɲe, ki niileu dia jatiɔk. ¹⁸ Ki binba maa na kur yoo jukbanjai bi sai ni, ki jɔɔ nba saa peb naatunn na be n boor ni. ¹⁹ Ki n bet niib na nan bi tɔɔndamm nan bi toontunna saakab na a, "Toonn na tant ki fɔkita, ki te ki ti yat leeb joonn na kur po. ²⁰ I-i tanj gbat naatunn na, ii taan n boor ni. Ti Yennu saa kɔn ki turit." ²¹ Li paak, daar kur, laa tuu nyi sanyafaar ki saa tuu nyiɔk, ti bɔkir tuune joonn na paak, n̄aan ki bɔkleer see nan kpana ki guut.

²² Li yoo na, ki n yet jab nba tee toonn saakab na, nan bi somm teeb na kur, a bii be Jerusalem, ki tuu guur doo na nyiɔk, kii biaki tuun toonn na yonnu ni. ²³ N din ki liatir n liant na nyiɔku, n̄mee ji boi n leeb na, koo n toontunna na, koo binba guun na. Ti kur din dia jatiate ti nii ni.

5

Ki jiin nandamm na talas dinu po

¹ Li poor poe ki niib na bonchiann, li jab nan poob, piin ki baat nan bi daamii ki jiin bi leeb Juu teeb po. ² Bi siab yeen a, "Ti n̄aateeb yab bonchiann, ki ti loon jeet ki lin foorit."

³ Ki leeb yaa, “Ti jii ti sarwaat, nan ti daan tiinii kpaant, nan ti ɲeie ki senn ɲaan gaar jeet nba saa janit ki tin nyi kon ni.”

⁴ Ki siab mun yaa, “Ti kpentir likiriie ki fit pa naan lampo nba ki bi gaan ti sarwaat nan ti daan tiinii kpaant paak na. ⁵ Timm nan ti Juu leeb na tee booryeɲe. Ti waas ki ɲan nan bi waas na kaa-a? ɲaan ti teen ti waas na daabae. Ti kɔi ti bonpoi na siabe ki teemm daaba. Ti ji ki mɔk paɲi, kimaan bi gaar ti kpaant nan ti daan tiinii sarwaata.”

⁶ Maa gbat bi maan maɲ yoo nba, ki n wutoor doo, ⁷ ki n lor nan man got bi barii maɲ ni. Ki n yakii nan tɔɔndamm nan toontunna saakak na, ki betib a, “I diin i ninjamme.”

N din yiin niib na tintaanu maa min got barii maɲ ni, ⁸ ki yet a, “Ti tuu ɲmat daa ti ninjamm Juu teeb nba kɔi bi mɔɲ ki teen boorganu nae, nan taa fit bianɲinba na. Mɔtana, i mukis i tiɔɲ ninjamm nae ki bi kɔi bi mɔɲ ki teen yimm nba tee bi leeb Juu teeb na.” Ki tɔɔndamm na ji kɔɲ baa saa yet linba, ki ɲmin soon nna.

⁹ Tɔn, ki n yet a, “Linba ki i tuun na ki ɲani. See ki i sak Yennu mɔb ki tun linba ɲan, ɲanne saa te ki ti datai nba tee boorganu na kan la yaak ki sukiiti. ¹⁰ Min nan n saakaleeb nan jab nba tuun n boor na, ti kpentir likirii nan jeet ki teen niib na. Mɔtana, ɲaant ki ti chabib ki bi daa pa. ¹¹ Ii kpi baa mɔk i pana nba kur, laa tee likirii amii jeet amii tilɔɔna daan amii olif tiinii kpamie, ki jiin bi sarwaat, nan bi daan tiinii na kpaant, nan kpan tiinii, nan bi ɲei, ki turib yiama.”

¹² Ki tɔɔndamm na jiin a, “Ti saa tun nan faa yet bianjinba nawa. Ti saa jiin bi faar nawa, ki kan mi boib pana na po.”

Ki n yiin mannteeb na, ki te tɔɔndamm na por bi numm ni nan bi saa dia mɔsonn nba ki bi senn nawa. ¹³ Njanne ki n bobit tann nba boob n siak ni na, ki pinnir, njaan yet a, “Yennu tan saa pinn daansɔɔ nba ki dia u mɔsonn nan maa pinn n tann na bianjinba nae. Yennu saa gaar i njei nan linba kur ki i mɔk na njaan nyiki yann.”

Ki sɔɔ kur nba be leŋ na yet a, “Lii tee nna,” njaan pak Yennu. Ki tɔɔndamm na ji gbeen bi mɔsona.

Nehemaya nba ki wuun bianjinba

¹⁴ Kpanbar Artaserses naan bina piinlee niŋe ki bi din turin Juda yudant, ki tan tuu u naan bina piintaa nan njanlee ni, ki li tee n yudant bina piik nan njanlee ni, njaan min koo n nikpiimm na sɔɔ ki dii jeet nba bo kpaa talas nan min yudaanɔ n di. ¹⁵ Wunba kur din teen yent yudaanɔ n liik tuu tee jikire niib na paak. U tuu gaan salimpeena piinnae daar kur ni, ki li tee jeet nan daan paak. Bi toontunna na gbaa mun bia tuu diin niib nae, njaan min njarin ki tuun nna, kimaan n tiin Yennu, ¹⁶ ki jii n paŋ kur ki waan joonn na maanu njaan ki boi faar po. Wunba kur tuun n boor taanin ki ti njamii maa joonn na. ¹⁷ N din yɔɔ dint Juu teeb nan bi tɔɔndamm kobik nan piinŋmue n njaak ni, ki pukin binba kur nyi digbangana ki baat n boor. ¹⁸ Ki daar kur ni, n tuu tur naab nan pei nba njan banloobe, nan korii bonchiann, ki dapiik kur ni ki n teemm dabooru booru. N poŋ din mi talas nba ki niib na dii, li

paak ki n ki boi sommir nba ki doo yudaano bo saa gaar na po.

¹⁹ Yennu, n meia maa fii tian maa tun linba kur ki tur niib na ki nhammin.

6

Baa lor Nehemaya paak bianjinba

¹ Ki Sanbalat nan Tobia nan Gesem nan ti datalei na gbat nan ti maa jonn na ki gbenna, ki yiar ji ki biar, n̄aan ki ti daa ki koon ganae tammokooka na ni. ² N̄anne ki Sanbalat nan Gesem turin m̄ob a n tookib Ono paanu ni, digbanbis na yenn ni. Linba na din tee kpare, ki bi koor a bin biirin. ³ Ki n tun toonii ki betib a, “N kan baari, n tuun toonn nba kpaa talase. N kan fit nyik toonn maŋ n̄aan baar ki tan laini.”

⁴ Bi din tun toonii taar munna n boor, n̄aan yoo kur n din teemm gatyemmiere.

⁵ Ki Sanbalat n̄amm tun u toontunna na yeno n boor nan m̄omaan nba pukin mun̄mu ni, ki li sob gboun̄ nba ki loon ni. ⁶ Ki gboun̄ na yet a:

“Gesem betin nan bunburimii be niib nba koo nant na sinsuuk ni, a fin nan Juu teeb na lor yin yēt kpanbar m̄obe, li paake ki i maa jonn na. U bia yet nan a lor fan teen a m̄on̄ bate, ⁷ ki a lor nan Yennu sokiniinba siab a bin m̄oont Jerusalem nan fine ji tee Juda bat. Kpanbar na saa gbat maan nawa. Li paake ki n dukin nan min nan fin n taan leeb ki got maan maŋ ni.”

⁸ Ki n turo gat u a, “Linba ki a yeen na kur ki tee barmonii, fine dukin na kur a t̄ion̄.”

⁹ Bi din koor a bin jeenite ki tin nyik toonn na. Ki n miar Yennu a, “Turimin paŋ mɔtana.”

¹⁰ Yoo nba nae ki n din saan gɔn Semaya, wunba tee Delaya bija, ŋaan tee Mehetabel yaaboonn na. U din ki tee u nyii u ŋaak ni. U din yetin a, “See fin nan min lakin saan bɔr Yenjiantu ŋasaakak na ni, ŋaan kpar li gana, kimaan bi baat a bin kpia. Bi saa baar nyiɔko ki tan kpia.”

¹¹ Ki n jiin a, “N ki tee nibooru nba tiin ki bɔri kaa. A dukin nan n sii koor a man bɔr Yenjiantu ŋasaakak na nie ki tinn n manfoori-i? N kan teen nna.”

¹² Maa dukin li po yoo nba, ki n bann nan Yennu kaa pak ki tur Semaya, ŋaan li tee Tobia nan Sanbalat-e kɔɔu a wun turin li kpaan booru.

¹³ Bi jɔɔnɔe a wun jeenin ki n tun biit, ki lin te n sann n biir, ki man di fei.

¹⁴ Ki n miar Yennu a, “Tiat linba ki Tobia nan Sanbalat tun na po, ki dat bi tuba. Tiat poo nba sann tee Noadia na po, nan sɔkiniileeb nba kur koor a bin jeenin na.”

Ki jiin toonn na gbennu po

¹⁵ Ti din jii daa piinŋmu nan ŋanlee-e, ki tun joonn na toonn ki gbenn, ŋmaarik nba ki bi yir Elul na, li dapiinlee nan ŋanŋmu daar. ¹⁶ Ti datai nba din kɔɔ digbana nba kpiat na nba gbat linba na yoo nba, ki bi bann nan bi kɔŋ nyannuwa, kimaan sɔɔ kur bann nan ti tun toonn na nan Yennu sommire.

¹⁷ Yoo nba na kur, ŋaan Juu teeb tɔɔndamm na nan Tobia din sɔb gbant bonchiann ki tur bi leeb. ¹⁸ Juda teeb bonchiann din taa u po, kimaan waa dantir nan Juu nirɔ Sekania, wunba tee Ara

bija na paak. Linba pukin, u bija Jehohanann din koon Mesulam, wunba tee Berekia bija na bipooe. ¹⁹ Niib din tuu piak Tobia toonana poe n boor, ki bia kumio maa yet linba kur, ki u teenin gbant ki yiab a wun jeenin.

7

¹ Ton, taa namm maa jonn na, ki koon li gana na poor poe, ki ti wann Yenjiantu nasaakak na tammoguura, nan yanyinna, nan Liifai teeb, bi toona. ² Ki n jii jab banlee ki teemm Jerusalem doo yudamm, ki bi tee n ninja Hanani, nan Hanania nba tee kunkonkonna yudaano na. Hanania din tee nimonee ki bia tiin Yennu, ki u loo kaa. ³ N din betib maa bi tuu daa lootir Jerusalem tammoi sanyapob ni, ki yonnu n torja. Ki daajoouku baar, bin bia tuu loon ki kpar tammoi nawa, ki tammoguura nan n fit seet. N bia din yet a bin jii binba koo Jerusalem doo ni nae ki teemm guura, ki te siab-ii guu siar po, naan ki leeb-ii guu kii kpia bi mon jei.

Binba din nyii Babilonn ki jen na sanae na (Esra 2.1-70)

⁴ Jerusalem din tee digbangbenjire, naan niib din ki yab lenj, ki jei bia daa ki yabi. ⁵ Yennu din turin yan ki n tikir niib na, nan bi toondamm, nan bi toontunna saakab, ki got bi sana njaak njaak. N din la binba nyii Babilonn sinsinn ki jen na sana gbant. Moman nba ki n la lenje na:

⁶ Niib bonchiann din nyii Babilonn yent ni ki nmat kun Jerusalem doo nan Juda yent ni, ki soo kur kun u tione doo ni. Bi naateeb pon din be Babilonn tin ni, laa nyii yoo nba ki kpanbar

Nebukanesar soorib ki teemm yommii nawa. ⁷ Bi toondamm din tee Serubabel nan Joosua nan Nehemaya nan Asaria nan Ramia nan Nahamani nan Mordekai nan Bilsann nan Misperef nan Bigfai nan Nehum nan Baana.

⁸⁻²⁵ Israel naakuut nba din nyii Babilonn ki jen na sana, nan bi niib kanne na:

Paros naakuuk ni niib din tee tusaa ŋanlee nan kobik nan piinlore nan banlee.

Ki Sefatia naakuuk ni niib tee kobii ŋantaa nan piinlore nan banlee,

ki Ara naakuuk ni niib tee kobii ŋanloob nan piinŋmu nan banlee,

ki Pahaf-Moab naakuuk ni niib tee tusaa ŋanlee nan kobii ŋanniin nan piik nan banniin; ki bi tee Jesua nan Joab yaaboona,

ki Elam naakuuk ni niib tee tusir nan kobii ŋanlee nan piinŋmu nan banna,

ki Satu naakuuk ni niib tee kobii ŋanniin nan piinna nan banŋmu,

ki Sakai naakuuk ni niib tee kobii ŋanlore nan piinloob,

ki Binnui naakuuk ni niib tee kobii ŋanloob nan piinna nan banniin,

ki Bebai naakuuk ni niib tee kobii ŋanloob nan piinlee nan banniin,

ki Asgad naakuuk ni niib tee tusaa ŋanlee nan kobii ŋantaa nan piinlee nan banlee,

ki Adonikam naakuuk ni niib tee kobii ŋanloob nan piinloob nan banlore,

ki Bigfai naakuuk ni niib tee tusaa ŋanlee nan piinloob nan banlore,

ki Adinn naakuuk ni niib tee kobii ŋanloob
nan piinŋmu nan banŋmu,

ki Ater, wunba ki bi bia yiu Heskia na,
naakuuk ni niib tee piinyia nan banniin,

ki Hasum naakuuk ni niib tee kobii ŋantaa nan
piinlee nan banniin,

ki Besai naakuuk ni niib tee kobii ŋantaa nan
piinlee nan banna,

ki Harif naakuuk ni niib tee kobik nan piik nan
banlee,

ki Gibeonn naakuuk ni niib tee piinyia nan
banŋmu.

²⁶⁻³⁸ Niib nba ki bi yeejamm din koo doi nba na
ni mun bia din jenna:

Betlehem nan Netofa doi teeb din tee niib
kobik nan piinniin nan banniin,

ki Anatof doo ni niib tee kobik nan piinlee nan
banniin,

ki Bef Asmafef doo ni niib tee piinna nan
banlee,

ki Kiriaf Jearim nan Kefira nan Beerof doi ni
niib tee kobii ŋanlore nan piinna nan bantaa,

ki Rama nan Geba doi ni niib tee kobii ŋanloob
nan piinlee nan yenokoo,

ki Mikmas doo ni niib tee kobik nan piinlee
nan banlee,

ki Betel nan Ai doi ni niib tee kobik nan piinlee
nan bantaa,

ki Nebo digbanleer na niib tee piinŋmu nan
banlee,

ki Elam digbanleer na niib tee tusir nan kobii
ŋanlee nan piinŋmu nan banna,

ki Harim doo ni niib tee kobii nantaa nan piinlee,

ki Jeriko doo ni niib tee kobii nantaa nan piinna nan banjmu,

ki Lod nan Hadid nan Ono doi ni niib tee kobii nanlore nan piinlee nan yeno,

ki Senaa doo ni niib tee tusaa nantaa nan kobii nanyia nan piintaa.

³⁹⁻⁴² Mannteeb naakuut nba din nyii Babilonn ki jena na:

Jedaya, ki u naakuuk ni niib tee kobii nanyia nan piinlore nan bantaa, ki tee Jesua yaaboona,

ki Imer naakuuk ni niib tee tusir nan piinjmu nan banlee,

ki Pasur naakuuk ni niib tee tusir nan kobii nanlee nan piinna nan banlore,

ki Harim naakuuk ni niib tee tusir nan piik nan banlore.

⁴³⁻⁴⁵ Liifai naakuut nba din nyii Babilonn ki jene na:

Jesua nan Kadmiel, ki bi naakuut ni niib tee piinlore nan banna, ki tee Hodafia yaaboona,

ki Yenjiantu nasaakak na ni yanyinna tee kobik nan piinna nan banniin, ki tee Asaf yaaboona,

ki Yenjiantu nasaakak na guura tee kobik nan piintaa nan banniin, ki tee Salum nan Ater, nan Talmonn, nan Akub, nan Hatita nan Sobai yaaboona.

⁴⁶⁻⁵⁶ Yenjiantu nasaakak na ni toontunna naakuut nba nyii Babilonn ki jena din tee:

Siha nan Hasufa nan Tabaof nan Keros nan Sia nan Padonn nan Lebana nan Hagaba

nan Salmai nan Hanann nan Gidel nan Gahar
 nan Reaya nan Resinn nan Nekoda nan Gasam
 nan Usa nan Pasea nan Besai nan Meunim
 nan Nefusesim nan Bakbuk nan Hakufa nan
 Harhur

nan Baslif nan Mehida nan Haras nan Barkos
 nan Sisera nan Tema nan Nesia nan Hatifa
 naakuut.

⁵⁷⁻⁵⁹ Solomonn toontunna na naakuut nba din
 nyii Babilonn ki jene na:

Sotai nan Soferef nan Perida nan Jaala

nan Darkonn nan Gidel nan Sefatia nan Hatil
 nan Pokeref-Hasebaim nan Amonn naakuut.

⁶⁰ Yenjiantu nasaakak na toontunna yaa-
 boona, nan Solomonn toontunna yaaboona nba
 din nyii Babilonn ki jene na, bi kur kann din tee
 niib kobii nantaa nan piinyia nan banlee.

⁶¹⁻⁶² Delaya nan Tobia nan Nekoa naakuut
 ni niib din tee kobii nantaa nan piinna nan
 banlee, bi din nyii doi nba tee Tel Mela nan Tel
 Harsa nan Kerub nan Adonn nan Imer-e ki jen,
 nnaan bi din ki fit wann nan bi set tee Israel teeb
 yaaboona.

⁶³⁻⁶⁴ Mannteeb naakuut nba na narin din ki
 la gbant nba sob ki wann bi yeejamm sana:
 Namme tee Hobaya nan Hakos nan Barsilai
 naakuut. (Mannteeb naakuuk nba yi Barsilai na,
 bi yeejae din koon poo ki u nyii Barsilai naakuuk
 ni, Gilead tij ni, ki u ji din pur u sann ki gaan nan
 u diamm naakuuk sann.) Baa din ki la gbant nba
 want bi yeejamm sana na, Juu teeb yudaano na
 din ki sak ki bi teen mannteebi. ⁶⁵ U din betib
 a bi kan fit di jeet nba ki bi mann marun ki tur
 Yennu na, see ki manntoo tan be ki jii bona nba

ki bi yir Yurim nan Tumim na ki bann Yennu loomm.

⁶⁶⁻⁶⁹ Binba din nyii Babilonn ki jen na kur din tee niib tusaa piinna nan njanlee nan kobii njanntaa nan piinloob.

Bi toontunna, jab nan poob, din tee tusaa njanlore nan kobii njanntaa nan piintaa nan banlore.

Yanyinna nba din tee jab nan poob din tee kobii njanlee nan piinna nan banjmu.

Taanii din tee kobii njanlore nan piintaa nan banloob.

Bontaanii din tee kobii njanlee nan piinna nan banjmu.

Laagumiinba din tee kobii njanntaa nan piintaa nan banjmu.

Ki bonii tee tusaa njanloob nan kobii njanlore nan piinlee.

⁷⁰⁻⁷² Niib bonchiann din lakin likiri nan bona ki somm, ki bi saa njanm maa Yenjiantu njanntaaak na:

Juu teeb yudaano na din tur:

salimmona, ki li kpaiu tee nan karwanta borik-
gbina njanntaa na

nan maruj senii piinjmu

nan mannteeb liatfoot kobii njanjmu nan piin-
taa.

Ki naakuut yudamm na tur:

salimmona, ki li kpaiu tee nan karwanta baajii
nan waan na

nan salimpeena, ki li kpaiu tee nan karwanta
baajii piik nan njanloob na.

Ki niib nba biar na tur:

salimmona, ki li kpaiu tee nan karwanta baajii
nan waan na

nan salimpeena, ki li kpaiu tee nan karwanta
baajii piik nan nanna na nan mannteeb
liatfoot piinloob nan njanlore.

⁷³ Ki Israel teeb kur, li mannteeb, nan Liifai
teeb, nan Yenjiantu na nasaakak na guura,
nan yanyinna, nan Israel nisiab, nan Yenjiantu
nasaakak na toontunna, din kar Juda digbang-
beṅa nan li digbanbis ni.

8

*Bianjinba ki Esra karin sennu gbouṅ ki tur niib
na*

¹ Li din tan baat nmaarii njanlore na, ki soṅ
Israel teeb na kur ji kar bi doi niṅe. Nmaarik
maṅ sinsinn daar, ki bi kur taan leeb Jerusalem,
bi tintaanboor nba ki bi yir Nyun Tammob na. Ki
bi yet Esra, wunba tee manntoṅ, ki bia tee sennu
banntoṅ na, a wun lon sennu gbouṅ na, sennu
nba ki Yennu din tur Moses a wun tur Israel teeb
na. ² Nanne ki Esra baar nan sennu gbouṅ maṅ,
siaminba ki niib na taan be na; li jab nan poob
nan waas nba chekit ki mək yan na din be leṅ.

³ Bi tintaanboor nba be tammokokir po na nie,
ki u din karin sennu na ki turib, ki piin sanyapob
ni, ki saa tuu yonsuuk ni, ki bi kur gbiint fanu.

⁴ Esra din see daat binbintir nba ki bi kpaa, ki li
tee tintaanu maṅ yar na paake. Jab nba nae din
see u niidiitu po: Matitia nan Sema nan Anaya
nan Yuria nan Hilkia nan Maaseya. Ki binba na
mun see u niigaṅ po: Pedaya nan Misael nan
Malkija nan Hasum nan Has-badana nan Sekaria
nan Mesulam.

⁵ Esra nba din see binbintir paak na, u din fok gar niib na, ki bi kur ninbina paa u paak. Waa pobit gboun na yoo nba, ki bi kur fiir set. ⁶ Ki Esra yet a, “Pakin ti Yomdaano Yabint Yennu na.”

Ki niib na kur donn bi nii sanpaapo njaan jiin a, “Li tee moniie.” Bi kur din baa fabin tij ni, ki jiant Yennu.

⁷ Ton, bi ji din fiir ki set bi sinsetboa, ki Liifai teeb na kat sennu na ki wantib: Namme tee Jesua nan Bani nan Serebia nan Jaminn nan Akub nan Sabetai nan Hodia nan Maaseya nan Kelita nan Asaria nan Josabad nan Hanann nan Pelaya. ⁸ Namme din kpint Yennu sennu na ki tur niib na, ki wannib li paak, ki bi bann.

⁹ Yoo nba ki niib na gbat sennu na nba loon bianinba na, ki li damm bi para, ki bi jak monii. Ki Nehemaya, wunba tee yent yudaano na, nan Esra, wunba tee manntoo ki bia tee sennu man banntoo na, nan Liifai teeb nba wantib sennu na, bet niib na kur a, “Dinna tee kasii daare ki tur ti Yomdaano Yennu, li paak, i daa fabin koo ki mo.

¹⁰ Motana, ii kun man ki saa teen jaamm. Biitir i jeet nan i daan ki tur binba ki mok ki li yab na. Dinna tee kasii daare ki tur ti Yomdaano, li paak i daa mok parbiiri. Parpeenn nba ki Yennu teeni na saa turi panj.”

¹¹ Liifai teeb na din lin ki maant niib na para, ki beerib nan bi daa mok parbiir, kimaan li daar manj tee kasii daare. ¹² Nanne niib na kur ji din kun ki saa dii, ki nyuu, ki mok parpeenn, ki chentir baa mok linba ki teen bi leeb, kimaan bi din bann baa karin linba ki turib na paaka.

Ki jün Lanbont jaamm po

¹³ Li daa ñanlee daar, ki naakuut tɔɔndamm, nan mannteeb, nan Liifai teeb na saan Esra boor, a bin tumii sennu na nba want bianjinba.

¹⁴ Sennu nba ki Yennu tur Moses a wun wann Israel teeb na ni, bi din la sennu nba wann a bin tuu faa lanbont kii kɔɔ, lanbont jaamm yoo na. ¹⁵ Li paak, ki bi din lin nan maan na ki tur Jerusalem kur po, nan li digbanlia ni, nan digbanbis ni a, “Saant man kunkona paak, ki saa chɔɔ kpek yiinii nan Olif yiinii nan yanpɔɔk yiinii nan kaatii yiinii nan tilei nba be, ki faa lanbont, nan sennu na nba wann bianjinba na.”

¹⁶ Tɔn, ki niib na lon yiinii na ki faa lanbont bi ñei yura paak,* nan bi dindont ni, nan Yenjiantu ñasaakak na dindonjouk ni, nan niib tintaamboor nba kpia Nyun Tammɔb, ki bia kpia Efraim Tammɔb na. ¹⁷ Niib nba kur din nyii Babilonn ki jen na din chaan lanbonte ki daa kɔɔ leŋ. Laa din nyii Nunn bija Joosua yoowa, bi sinsinn lanbont chaanue na, ki sɔɔ kur mɔk parpeenn ki kpamm. ¹⁸ Bi din tuu karin Yennu sennu na waame, daar kur ni, laa nyii jaamm na piinu daar ki saa tuu li joontu. Bi din dii jaamm na daa ñanlore-e, ki daar nba pukin ñanniin na ni, ki bi kar li gbennu tintaankaanu, nan sennu nba wann bianjinba.

9

Bianjinba ki niib na pak kat bi yanbɔmm

* **8:16** 8.16 Bi ñei yura paak, bi din tuu sere.

1-2 Nmaarik manɗ dapiinlee nan nanna daare, ki Israel teeb na din taan leeb a bin lor moi, ki lin wann bi parbiir nba tee bianjinba, bi yanɓomm paak. Bi poŋ din bokit bi moŋ nan boorganu kurawa. Bi din lia bɔtoote ki puk bi yura tanpent, ki li wann bi parbiir, ki bi ji din fiir set, naan piin ki piak kat yanɓomm nba ki namm nan bi yeejamm din tun na. ³ Bi din jii awa nantaae ki karin bi Yomdaano Yennu sennu ki turib, ki awa nantaa nba din wei na, ki bi jii ki kat bi yanɓomm naan jiant bi Yomdaano Yennu.

⁴ Binbintir din be ki tee Liifai teeb sinsetboor, ki Jesua nan Bani nan Kadmiel nan Sebania nan Buni nan Serebia nan Bani nan Kenani, doo ki set. Bi din miar bi Yomdaano Yennu sanpaapoewa.

⁵ Liifai teeb nae din tuu be bi toonn, jiantii ni. Namme tee Jesua nan Kadmiel nan Bani nan Hasab-neya nan Serebia nan Hodia nan Sebania nan Petahia. Bi din yet a:

“Fiit set ki pak i Yomdaano Yennu.

Ii pak donto nan yoo nba kaa gbennu.
Naant ki soo kur n pak u baakir sann na,
naan nisaarik dontir lek kan jaŋo.”

Ki jiiin dontir Yenmiaru po

⁶ Ki Israel teeb na miar Yennu a:

“Yennu, fin kooe tee Yennu,

fine nan sanpaak nan nmaabira nba be
sanpagbouŋ paak na.

Fine nan tij nan mokgbenja nan linba kur be li
ni na,

fine tur bonfoor kur manfoor.
Sanpaapo bona kur gbaant ki jiantira.

- 7 Yomdaano Yennu, fine gann Abram ki nyii nana
 Ur nba be Babilonn tiŋ ni,
 fine din lebit u sann ki teen Abraham.
- 8 A din la nan u tee nimona, ki a lor nana,
 ki senn masonn nan a saa turo Keenann
 teeb, nan Hef teeb,
 nan Amor teeb, nan Peris teeb, nan Jebus
 teeb,
 nan Girgas teeb tinii, ki lii tee tiŋ nba ki u
 yaaboona sii koo.
- A dia a masona, kimaan a tee barmonpakiro.
- 9 “A la ti yeejamm nba dii biak Ijipt bianjinbawa,
 ki bi din boia sommir po, Mokmuŋ na boor,
 ki a gbiint.
- 10 A din tun bakitnaun toonjaana ki biir Ijipt
 kpanbar na,
 nan u toontunna saakab, nan tiŋ na niib
 kura,
 kimaan a mi baa dinn a niib na biak
 bianjinba.
- A din nyann, ki gaar sann nba ki a mok dinna
 na.
- 11 A din bir sonu mkgbenir na ni ki tur a niib,
 ki bi somm tinkoon paak ki poot,
 ki binba din waa beerib na dii nyun
 nan tann nba tuu baa mkgbenir ni ki kpai
 bianjinba na.
- 12 A din tuu dia sanpagbouŋo ki wantib sonu
 yonnu ni,
 ki nyiak ki a dia muu ki yentir bi sonu.
- 13 A din nyii sanpaapo ki sik Sainai joor paak, ki
 pak tur a niib,
 ki turib sennii nba nan, nan wannu nba
 took.

14 Fine din wannib a bii dia a foon daar na fanu,
ki teenir kasii.

A din jii a sennii nae ki tur a toontunno Moses,
ki u tur a niib.

15 “Kon nba din soorib yoo nba, ki a turib jeet, ki
li nyii sanpaapo.

Ki nyunnyukuru nba soorib yoo nba, ki a turib
nyun, ki li nyii tanpiiuk ni.

A din betib a bin yent tij nba ki a senn nan a saa
turib na.

16 Naan ki ti yeejamm na donn bi moŋ ki teen
tubkangbata,
ki yêb bin sak a sennii na.

17 Bi din yêb mōsakuwa, ki tamm linba kur ki a
tun nawa,
ki bia tamm bakitnaun toona nba ki a tun
na.

Bi karinbaanii paak, ki bi gann tōondaano
a wun jiiib ki ŋmat namm daabisin ni, Ijipt
tij ni,
naan a tee Yennu nba nyikin ki chabite,
ki bia mōk parmaasir nan lomm, ki a wutoor
ki do yian,
ki a ninbatinu yab, ki a ki nyor nyikibi.

18 Bi din maa tingbanne, ki li naan naajabik,
ki yet a ŋanne tee bi yennu nba daan nyii
namm Ijipt na.

Yennu, bi din sukiia bonchiann.

19 Naan a din ki nyikib kunkoouk na paaki,
kimaan a ninbatinu yab.

A din ki jii sanpagbouŋ koo muu nba gar bi tōonn
ki wantib sonu yonnu nan nyiok na ki yaat
nanni.

20 A binbenṇaṇ paak, ki a din wannib baa saa teen bianjinba.

A din dinnib jeet nba tee mana na,* ki bia turib nyun ki bi nyuu.

21 Bina piinna nba ki bi din be kunkoouk paak na,
 ṇaan a din teemm bi bonloṇa kur, bi liant din ki ban kpet,
 ki bi taa din ki mɔɔr bi sommir paaki.

22 “A te ki bi nyann digbana nan naan yent, nan tini nba ter namm.

Bi din kɔn nyann Hesbonn tiṇ nba ki Sihonn din dia na,
 nan Basann tiṇ nba ki Og din tee leṇ bat na.

23 A turib waas ki bi yab nan ṇmaabira nba be sanpaapo
 bianjinba nae,
 ki te ki bi kɔn nyann ki kɔɔ tiṇ nba ki a din senn
 nan a saa tur bi yeejamm na ni.

24 Bi din nyann Keenann tiṇ, fine nyann niib nba kɔɔ leṇ na.

A din tur a niib na yiikoo a bin tun bianjinba ki bi loon
 ki tur Keenann teeb nan bi kpanbara.

25 A niib na din nyann digbana nba mɔk joonpaara, nan tinkpiasa,
 ki li ṇei gbee nan mɔkint, ki bunbuna poṇ gbiira ki be li ni,
 nan kpan tiinii nan daan tilontii kpaant nan tilontilia,
 ki bi di baa loon bianjinba ki gbenjit,

* **9:20** 9.20 Mana tee jeet nba nyi sanpaapo ki baa tiṇ na paak.

ki laat bonḡana nba kur ki a teemm, ki bi di nan parpeenn.

26 “Ḥaan a niib na din yêṭ a mōbe, ki lin a poor. Bi din kp̄ii a sōkiniinba nba tuu teemm kpaanii na,

binba beerib a bin ḡmat jen a boor na.

A niib na tuu sukiiæ yoo n tuu yoo.

27 Li paak ki a te ki bi datai nyannib, ki ji diab.

Baa be wahala ni na, ki bi boia sommir po, ki a be sanpaapo ki gat turib.

A ninbatinu nba yab na paak, ki a turib tōondamm nba fatib bi datai boor.

28 Parmaasir nba din tan be yoo nba na, ki niib na bia ḡamm tun yanbōmm, ki a bia te ki bi datai na nyannib;

ḡaan baa tan kat bi yanbōmm ki lebit bi binbeḡ ki boia sommir po yoo nba, ki a be sanpaapo ki gbiint,

ki teenib gatu, ki tintib yoo nan yoo, a ninbatinu nba yab na paak.

29 A din kpaanib a bin sak a wannu,

ki bi karinbaanii paak ki bi yêṭ a sennii, ḡaan a sennu na dianue tee manfoor sōnu.

Bi mōyêṭuk nan bi tubkangbatin na paake, ki bi ḡmant bi poor ki tura.

30 Binn n tuu binn, a teemm kpaanii nan sukuru. A te ki a sōkiniinba pak, ḡaan a niib na tee tuukpæe,

li paak ki a te ki digbanlia nyannib.

31 Ḥaan a ninbatinu nba yab na paak, ki a ki nyōr nyikib,

koo ki boontibi.

A tee parmaasir nan ninbatinu Yennu-e.

- 32 “Yennu, ti Yennu, a mantik tee Yenjaanne.
 A tee janmaansooruk nan yiikoo daanœ.
 A dia a molor nba ki a din senn na nan barmœnii.
 Laa nyii yoo nba ki Asiria kpanbara din dintit
 biak na
 ki tan tuu mœtana, ti mantik dii farawa.
 Ti kpanbara, nan ti tœondamm, nan mannteeb,
 nan a sœkiniinba,
 nan ti yeejamm, nan ti niib na kura dii biaka.
 Tiat taa mantik dii fara bianjinba.
- 33 Faa dat ti tuba na, a tun fanuwa, nan taa lek
 tun yanbœmm na,
 ŋaan fin ŋarin tuun ŋante.
- 34 Ti yeejamm, nan ti kpanbara, nan ti
 tœondamm,
 nan mannteeb na din ki dia a sennu na.
 Bi din ki gbiint a sennii nan a kpaanii na.
- 35 Fine tee piisin kpanbara paak, ki bi dia a niib.
 Ki a turib tin nba yarin ki bia kpai, ki bi be len,
 ŋaan ki bi yœt bin nyik bi yanbœmm ki jianta.
- 36 Ki mœtana ki ti ji tee yommii, tin nba ki a turit
 na ni,
 ki li tee tinkpiasir nba teent jeet.
- 37 Linba ki tin na naan na,
 li tee kpanbara nba ki a sennib ki bi diat na
 yaraœ,
 kimaan ti yanbœmm paak.
 Bi diat nan ti tee bonkobit nae,
 ki tuun nant baa loon bianjinba, ki ti be
 parbichion ni.”

Ki jün lor nba ki niib na din taan ki sœb na po

- 38 Laa tun nna paak, ki timm Israel teeb taan
 leeb ki lor lor, ki sœb teenir gbant ni, ki ti

tɔɔndamm, nan Liifai teeb, nan mannteeb na dinn bi yiikoo dinta li paak.

10

¹ Wunba din sint sɔb u sann gboun na ni tee min Nehemaya nba tee Hakalia bija na, ki tee tin na yudaanɔ; ki Sedekaya mun bia sɔb u sann. Ki niib nba na mun bia sɔb bi sana:

annteeb tee:

²⁻⁸ Seraya nan Asaria nan Jeremaya nan Pasur nan Amaria nan Malkija nan Hatus nan Sebania nan Maluk, nan Harim nan Meremof nan Obadia, nan Daniel nan Ginetonn nan Baruk nan Mesulam nan Abija nan Mijaminn nan Maasia nan Bilgai nan Semaya.

Liifai teeb tee:

⁹⁻¹³ Joosua, wunba tee Asania bija na, nan Binnui, ki u nyii Henadad naakuuk ni, nan Kadmiel nan Sebania nan Hodia nan Kelita nan Pelaya nan Hanann nan Mika nan Rehob nan Hasabia nan Sakur nan Serebia nan Sebania nan Hodia nan Bani nan Beninu.

Ki niib na tɔɔndamm tee:

¹⁴⁻²⁷ Paros nan Pahaf Moab nan Elam nan Satu nan Bani nan Buni nan Asgad nan Bebai nan Adonija nan Bigfai nan Adinn nan Atir nan Hesehia nan Asur nan Hodia nan Hasum nan Besia nan Harif nan Anatof nan Nebai nan Mag-pias nan Mesulam nan Hesir nan Mesesabel nan Sadok nan Jadua

nan Pelatia nan Hanann nan Anaya
 nan Hosea nan Hanania nan Hasub
 nan Halohes nan Pilha nan Sobek
 nan Rehum nan Hasabna nan Maaseya
 nan Ahia nan Hanann nan Anann
 nan Maluk nan Harim nan Baana.

Ki jün lor na po

²⁸ Timm Israel teeb, nan mannteeb, nan Liifai teeb, nan Yenjiantu nasaakak na guura, nan li yanyinna, nan li toontunna, nan leeb nba kur mək məkaku nan Yennu sennu, ki pukin ti poob nan ti waas nba chekit ki mək yan na, bokit ti mən nan boorganu nba koo ti tinj ni nawa. ²⁹ Ki ti taan leeb ki lor nan ti toondamm lorjaann nan ti saa dia Yennu sennu na, linba ki Yennu turit, ki li nyii u toontunnə Moses boor na. Ti saa sak linba kur ki ti Yomdaanə Yennu senn nawa, ti bia saa dia u sennii nan linba kur ki u wannit, njan li-i tee ki ti tan yēt lorjaann man, biak sii be ti paak.

³⁰ Timm nan boorganu nba koo ti tinj ni na, ti kii kooont leeb waas.

³¹ Li-i tee boorganu baar nan jeet, koo linba kur a bin koi turit, ki li tee foon daar, koo kasii daa ni, ti kan daa.

Ki bina njanlore kur ni, ti tuu kan ko kpaant, ti tuu saa piin pana nba ki niib diie, ki bi daa pa.

³² Binn kur ni, soo kur tuu saa lakin salimpeena waan, ki lin jii tun Yenjiantu nasaakak na toona.

³³ Ti saa tur Yenjiantu nasaakak na ni jiantii bona nba nae: kasii boroboro, nan daar kur jeet Yenpiinii, nan bonkobit nba ki bi saa joob muu,

ki li tee daar kur maruŋ, nan kasii Yenpiinii nba tee foon daar yar, nan ŋmaapaan jaamm yar, nan jaanlia yara, nan kasii Yenpiinii bonlia, nan Yenpiinii nba saa nyinn Israel teeb biit, nan linba kur ki bi sii loon Yenjiantu ŋasaakak na ni.

³⁴ Timm nba tee mannteeb, nan Liifai teeb, nan nilee na tuu saa to naatote binn kur, ki nyinn naakuut nba tuu saa tur daat, ki lin joo maruŋ bona nba ki bi mann ki teen ti Yomdaano Yennu, nan sennu na nba wann bianjinba na.

³⁵ Binn kur, ti tuu saa baar nan ti sinsinn jeet nba ki ti jaan nae, nan sinsinn tiloona nba monn na, Yenjiantu ŋasaakak na ni.

³⁶ Soɔ kur saa jii u bikperik nba tee bonjak, ki saan nana mannteeb boor, Yenjiantu ŋasaakak na ni, ki saa jiiu tur Yennu nan sennu nba wann bianjinba na. Ti bia tuu saa jii naabis nba ki ti nei sint marib na, koo pebis koo bubis nba ki ti pei nan buunii sint ki marib nae ki tur Yennu.

³⁷ Binn kur, ti bia tuu saa jii ti sinsinn jeet nba ki ti jaan na yon, ki tur manntoo, Yenjiantu ŋasaakak na ni, ki pukin Yenpiinii nba tee tiloona daan nan olif tiinii kpan, nan tiloonbooru kur nba be.

Ti saa jii ti jeet nba ki ti ko na, li piik ni yennkoo, ki tur Liifai teeb, binba gaan ti kpaant ni jeet piik ni yennkoo na. ³⁸ Mannteeb nba tee Aaronn yaabona na tuu sii be nan Liifai teeb, yoo nba ki bi gaan bona piik ni yennkoo na, ki Liifai teeb na tuu saa jii piinii na piik ni yennkoo ki koon Yenjiantu ŋasaakak jeet diit na ni, ki bii dia kii tuun Yenjiantu ŋasaakak na toona.

³⁹ Ki Liifai teeb na nan Israel nilee na tuu saa

baar nan bi libina nba tee jeet, nan tiloona daan, nan olif tiinii kpan, ki koonir tiat binbir boa, siaminba ki Yenjiantu nasaakak kutsonii be na, ki li tee siaminba ki mannteeb nba tuun toona, nan Yenjiantu nasaakak na guura, nan Yenjiantu nasaakak yanyinna be na.

Ti kan nyik Yennu nasaakak na sommiri.

11

Ki jün niib nba din koo Jerusalem na po

¹ Töondamm na din kar Jerusalem, ki leeb nba biar na to naatoot ki gann nayan nkoo, nei piik kur ni, a bin saan koo Jerusalem, kasii doo na ni, naan ki leeb nba biar na n koo digbangbeja nan digbanbis nba biar na ni. ² Niib na din pak kpakit wunba kur biar sak ki saa koo kar Jerusalem, u tiön lomm ni. ³ Digbangbeja nan digbanbis nba din biar na nie ki niib na, nan mannteeb, nan Liifai teeb na, nan Yenjiantu nasaakak na ni toontunna, nan Solomonn naatoontunna yaaboona na din koo. Ki soo kur koo u naak ni, u tiön doo ni.

Niib nba nae din tee töondamm nba nyii Juda yent ni, ki koo Jerusalem:

Juda booru ni niibe tee:

⁴ Ataya, ki u baa tee Yusia, ki Yusia baa tee Sekaria, ki u yeejaleeb tee Amaria nan Sefatia, nan Mahalalel, ki bi waa leeb paak ki tee Juda bija Peres yaaboona.

⁵ Maaseya, ki u tee Baruk bija, naan tee Kolhose yaaboonn, ki u yeejaleeb tee Hasaya, nan

Adaya, nan Joyarib, nan Sekaria, ki bi waa leeb paak ki tee Juda bija Sela yaaboona.

⁶ Ki Peres yaaboona ni jab kobii nanna nan piinloob nan banniin nba tee nijaana din kar Jerusalem.

Benjaminn booru ni niibe tee:

⁷ Salu, ki u tee Mesulam bija, nnaan tee Joed yaaboonn, ki u yeejaleeb tee Pedaya, nan Kolaya, nan Maaseya, nan Itiel, nan Jesaya, ki bi waa leeb paak, ⁸ nan Gabai nan Salai, ki bi mantik kpiin nan Salu.

Benjaminn booru nba din koo Jerusalem na kur din tee niib kobii nanyia nan piinlee nan banniime. ⁹ Joel, wunba din tee Sikri bija nae din tee bi toondaano, ki Juda, wunba tee Hasenua bija na tee wunba waa paa doo na yudaano paak.

Mannteebe tee:

¹⁰ Jedaya, ki u tee Joyarib bija, nan Jakinn.

¹¹ Seraya, ki u tee Hilkia bija, nnaan tee Mesulam yaaboonn. Ki u yeejamm bia tee Sadok, nan Merayof, nan Ahitub, ki bi waa leeb paak, ki Ahitub tee mannteeb yudaano. ¹² Niib kobii nanniin nan piinlee nan banlee-e din nyii naakuuk na ni, ki tee Yenjiantu nasaakak na ni toontunna.

Adaya, ki u tee Jeroham bija, nnaan tee Pelalia yaaboonn. U yeejamm bia din tee Amsi, nan Sekaria, nan Pasur, nan Malkija, ki bi waa leeb paak. ¹³ Niib kobii nannlee nan piinna nan banlee-e din tee nei toondamm naakuuk na ni.

Amasai, ki u tee Asarel bija, ki tee Asai yaboonn. U yeejamm din tee Mesilemof nan Imer.

¹⁴ Naakuuk nba na ni din mək kunkonkɔnwakita kobik nan piinlee nan banniin, ki bi tɔɔndaano tee Sabdiel, ki u tee nijaann bik.

Liifai teebe tee:

¹⁵ Semaya, ki u tee Hasub bija, ɲaan tee Asrikam yaaboonn, ki u yeejamm tee Hasabia nan Buni ki bi waa leeb paak.

¹⁶ Sabetai nan Josabad, ki bi tee Liifai teeb yudamm nba din gorii Yenjiantu ɲasaakak na nanyer po toona paak.

¹⁷ Matania, ki u tee Mika bija, ki tee Sabdi yaaboonn, ki Sabdi mun tee Asaf yaaboonn. Ɗɔɔ Matania-e din ɲmakitir Yenjiantu ɲasaakak na ni yanyinna, ki bi yiin niipoturu nan Yenmiaru yanii.

Bakbukia, ki u din tee Matania sommtɔɔ.

Abda, ki u tee Samua bija, ki tee Galal yaaboonn, ki Galal mun tee Jedutunn yaaboonn.

¹⁸ Liifai teeb nba din kar Jerusalem, kasii doo na ni, bi kur din tee kobii ɲanlee nan piinniin nan bannae.

Yenjiantu ɲasaakak na guurae tee:

¹⁹ Akub nan Talmonn nan bi nikpiimm, ki bi kur tee kobik nan piinlore nan banlee.

²⁰ Ki mannteeb nan Liifai teeb nba biar na, nan Israel nilee na din kar bi tɔɔɲ ɲei ni, digbanlia nba be Juda yent ni na. ²¹ Yenjiantu ɲasaakak na toontunna din kɔɔ Jerusalem, bɔkir nba ki bi yi Ofel nae, ki Siha nan Gispa tee bi saakab nba gorii toonn na paak.

²² Saakɔɔ nba gorii Liifai teeb nba be Jerusalem na sann din tee Usi, ki u tee Bani bija, ɲaan

tee Hasabia yaaboonn, ki u yeejamm bia din tee Matania nan Mika, ki ηϙϙ Usi tee Asaf naakuuk ni nirϙ; naakuuk maηe din yen ηasaakak na ni yanyinu. ²³ Naan sennu din be ki want bianηinba ki naakuut na sii yiin yanii ki gaan leeb, Yenjiantu ηasaakak na ni, daar kur.

²⁴ Ki Petahia nba tee Mesesabel bija, ki nyii Sera naakuuk ni, ki tee Juda booru na, ηϙϙe din see Israel teeb paak, Peesia kpanbar boor.

Ki jün niib nba kϙϙ digbanlia ni na po

²⁵ Niib na bonchiann din kar doi nba kpia nan bi kpaante. Binba din nyii Juda booru ni na din kar Kiriaf Arba, nan Dibonn, nan Jekabseel nan digbanbis nba kpia digbangbeηa na. ²⁶ Bi bia din kar Jesua nan Molada nan Bef-pelet, ²⁷ nan Hasar-sual, nan Beerseba, nan digbanbis nba kookir. ²⁸ Bi din kϙϙ Siklag doo ni, ki li be Mekona yent ni, nan li digbanbis ni, ²⁹ ki bia kϙϙ En-rimonn nan Sora nan Jarmuf ³⁰ nan Sanoa nan Adulam, nan digbanbis nba kpia digbangbeηa na. Bi bia din kϙϙ Lakis nan kpaant nba kpiar na, nan Aseka nan li digbanbis ni. Li wann nan Juda teeb din kϙϙ yent nba be Beerseba, ki li be niidiitu po na, nan Hinom baauk nba be niiganη po na sinsuuk nie.

³¹ Niib nba din nyii Benjaminn booru ni na din kϙϙ Geba, nan Mikmas, nan Ai, nan Betel, nan digbanbis nba kpiar nae, ³² nan Anatof, nan Nob, nan Anania, ³³ nan Hasor, nan Rama, nan Gitaim, ³⁴ nan Hadid, nan Seboyim, nan Nebalat, ³⁵ nan Lod, nan Ono, nan Tikpeera Baauk na ni. ³⁶ Liifai teeb nba din tuu kar Juda yent ni na, bi din bokit

bi siab, ki bi saan koo nan Benjaminn booru ni niib.

12

Mannteeb nan Liifai teeb sanae na

¹ Mannteeb nan Liifai teeb nba din nyii Babilonn, ki namm nan Serubabel, wunba tee Sealtiel bija, nan Joosua, ki u tee mannteeb yudaano na, tok jen na sanae na:

Mannteeb na sanae tee:

²⁻⁷ Seraya, nan Jeremaya, nan Esra, nan Amaria nan Maluk nan Hatus nan Sekania, nan Rehum nan Meremof nan Ido, nan Ginnetoi, nan Abija, nan Mijaminn, nan Madia nan Bilga, nan Semaya nan Joyarib nan Jedaya nan Salu nan Amok nan Hilkia nan Jedaya.

Jab nba nae din tee mannteeb man kura toondamm, mannteeb yudaano Joosua yoo.

Liifai teeb:

⁸ Liifai teeb nae tee binba din gorii ki bi yiin niipoturu yanii. Namme tee Jesua nan Binnui nan Kadmiel nan Serebia nan Juda nan Matania.

⁹ Binba nae din tee motaauk yanyinna nba din tuu gaan yanii. Namme tee Bakbukia, nan Uno, nan bi Liifai-leeb.

Ki jiin mannteeb yudaano Joosua yaaboona po

¹⁰ Joosua-e din tee Joyakim baa, ki Joyakim tee Eliasib baa, ki Eliasib tee Joyada baa, ¹¹ ki Joyada tee Jonatann baa, ki Jonatann tee Jadua baa.

Ki jiin tɔondamm nba nyii mannteeb naakuut ni na po

12-21 Yoo nba ki Joyakim din tee mannteeb yudaano na, ki mannteeb nba na tee tɔondamm nba be mannteeb naakuut ni:
 Maraya din tee Seraya naakuuk yudaano
 ki Hanania tee Jeremaya naakuuk yudaano
 ki Mesulam tee Esa naakuuk yudaano
 ki Jehohanann tee Amaria naakuuk yudaano
 ki Jonatann tee Maluki naakuuk yudaano
 ki Joosef tee Sebania naakuuk yudaano
 ki Adna tee Harim naakuuk yudaano
 ki Helkai tee Merayof naakuuk yudaano
 ki Mesulam tee Ginetonn naakuuk yudaano
 ki Sikri tee Abija naakuuk yudaano
 ki Miniaminn naakuuk yudaano sann kaa,
 ki Piltai tee Moadia naakuuk yudaano
 ki Samua tee Bilga naakuuk yudaano
 ki Jehonatann tee Semaya naakuuk yudaano
 ki Matenia tee Joyarib naakuuk yudaano
 ki Usi tee Jedaya naakuuk yudaano
 ki Kalai tee Salai naakuuk yudaano
 ki Eber tee Amok naakuuk yudaano
 ki Hasabia tee Hilkia naakuuk yudaano
 ki Netanel tee Jedaya naakuuk yudaano

Ki jiin mannteeb nan Liifai teeb nei saakab po

22 Bi din sob Liifai teeb nan mannteeb nei saakab sana na, yoo nba ki mannteeb yudamm daa din be na. Namme tee Eliasib, nan Joyada, nan Jonatann nan Jadua. Sana na din sob yoo nba ki Darius tee Peesia kpanbar nae.

²³ Liifai teeb ɲei saakab sanæ na, bi din sob teen maan gbant nie ki tan tuu Jonatann, wunba tee Eliasib yaaboonn na yoo.

Ki jiin Yenjiantu ɲasaakak na ni toona biitu po

²⁴ Hasabia nan Serebia, nan Jesua nan Binui nan Kadmiel-e din tee saakab nba bokit Liifai teeb na koonn koonn. Koonn munlee din tuu lakin, ki koonyenn yiin ki dontir Yennu, ki leeb na gaan ki teenɔ niipoouk nan kpanbar Defid, wunba tee Yennu nirɔ na nba wann bianjinba na.

²⁵ Yennu ɲasaakak guura nba nae din guu tiat diit nba kpia nan ɲasaakak tammɔi na, ɲamme tee Matania nan Bakbukia, nan Obadia, nan Mesulam nan Talmonn, nan Akub.

²⁶ Niib nba na din be Joyakim, wunba tee Joosua bija, ɲaan tee Jehosadak yaaboonn na yoo, ki bia be min Nehemaya nba tee yent na yudaanɔ na yoo, ki bia be Esra nba tee manntɔɔ ki tee sennu banntɔɔ na yoo.

Bianjinba ki min Nehemaya jii doo na joonn ki tur Yennu

²⁷ Yoo nba ki bi din jii Jerusalem doo joonn ki tur Yennu na, ki bi tun siaminba kur ki Liifai teeb be, ki yiimm a bin taan tintaanu ki jiin baa jikin joonn na ki teen Yennu na po, ki yin niipoturu yanii nan bonmumɔot nba tee duunii nan kɔna.

²⁸ Liifai naakuut nba tee yanyinna na din nyii baa kar siaminba kur, ki li kpia Jerusalem, ki bia nyii doi nba kpia Netofa, ²⁹ ki bia nyii Befgilgal nan Geba nan Asmafef, ki baar Jerusalem.

³⁰ Mannteeb nan Liifai teeb na din ɲamm bi mɔɲ nan niib na, nan tammɔi, nan doo na joonn.

³¹ Ki n te Juda tōondamm na doo joonn na yur paak, ki n bōkit yanyinna na koonjaana ŋanlee, a bin somm lint doo na kii teen Yennu niipoouk.

Ki sinsinn koonn na gaar niidiitu po, joonn na yur paak, ki jiin Tanpenn Tammōb na po.

³² Ki Hosaya somm waa yanyinna na poor po, ki Juda tōondamm bōkir waa paa. ³³⁻³⁵ Ki mannteeb nba din peeb naatuna, ki waa paa na tee Asaria, nan Esra nan Mesulam nan Juda, nan Benjaminsinn, nan Semaya nan Jeremaya. Wunba din wei pukin tee Sekaria, ki u tee Jonatann bija, ŋaan tee Semaya yaaboonn. (Ki u yeejaleeb tee Matania nan Mikaya, nan Sakur, ki bi waa leeb paak ki nyii Asaf naakuuk ni.) ³⁶ Niib nba din wei paan Sekaria paak na nyi u naakuuk nie, ki bi sana tee Semaya nan Asarel, nan Milalai, nan Gilalai, nan Maai nan Netanel, nan Juda, nan Hanani. Bi kur din dia bonmumōot booru nba ki Yennu nirō, kpanbar Defid din faa nae. Esra, wunba tee banntōō nae din lii koonn na tōonn. ³⁷ Baa din baar tammōb nba ki bi yir Nyuntonn Tammōb na, ki bi tōkin sōnu nba do Defid doo niŋ na, ki baar gar kpanbar Defid ŋaak, ki ŋmat doo joonn na tammōb nba ki bi yir Nyun Tammōb na boor, ki li be doo na yondo po.

³⁸ Ki koonleer nba yiin niipoturu yaŋ na gaar gaŋ po, joonn na yur paak, ki min nan niib na bōkir wei bi poor. Ki ti somm difoouk nba ki bi yir Bonpur Difoouk na paak, ki saa gar ki baar Joon-yarinn na boor, ³⁹ ki nyii leŋ ki somm ki saa gar tammōb nba ki bi yir Efraim tammōb na, nan Jesana tammōb na, nan Janii tammōb

na, nan Hananiel difoouk, nan Kobik difoouk na, ki ji baar tammɔb nba ki bi yir Pei tammɔb na. Ti din gbenn ti sommir na Yenjiantu nasaakak tammɔkɔkir na boore.

⁴⁰ Ki koonn munlee nba teen Yennu niipoouk na baar Yenjiantu nasaakak na boor.

Tɔɔndamm na bɔkir din be n boor, ⁴¹ ki pukin mannteeb nba peeb naatuna, ki bi sana tee: Eliakim, nan Maaseya nan Miniamin, nan Mikaya nan Eliwenai nan Sekaria, nan Hanania.

⁴² Ki Maaseya nan Semaya nan Eleasar nan Usi nan Jehohanann nan Malkija nan Elam nan Eser din wei paan bi paak. Ki Jesrahia nɔmakitir yanyinna na, ki bi yiin nan kunkɔpaara.

⁴³ Li daar maɲ bi din mann marint bonchiann, ki niib na ji mɔk kpinkpammuk, kimaan Yennu-e te ki bi mɔk parpeenn bonchiann. Ki poob nan waas na kur taamm ki kpaam, ki fuur nba ki bi fu na saa banfɔkir bonchiann.

Bianjinba ki bi lon Yenjiantu nasaakak na ni Yenjiantbona

⁴⁴ Li yoo na ki bi nyinn jab nba sii gorii Yenjiantu nasaakak na ni tiat nba ki bi lib na binbir boor, ki li tee bona piik ni yennkɔɔ, nan binn ni jeet kur sinsinn jaauɲ, nan sinsinn loona nba ki bi pɔɔr. Jab nba nae ki li din kpaab nan bii gaan jeet libina nba nyi kpaant nba be bi yentnba ni, ki li tee mannteeb nan Liifai teeb yara, nan sennu na nba wann bianjinba na. Ki Juda niib na kur mɔk parpeenn, mannteeb nan Liifai teeb na paak, ⁴⁵ kimaan baa din mann yanbɔmm wuuru maruɲ, nan toonlia nba ki Yennu senn paak na. Yenjiantu nasaakak na ni yanyinna, nan

Yenjiantu ɲasaakak maɲ guura na mun din tun bi toona, ki li wei nan kpanbar Defid nan u bija Solomonn nba din wann bianjinba na. ⁴⁶ Laa nyii kpanbar Defid nan Asaf, wunba tee yanyinnɔ na yoowa, yanyin-tɔɔndamme din tuu ɲmakitir yanyinna, ki bi yiin ki dontir Yennu, ki bia teenɔ niipook. ⁴⁷ Serubabel nan Nehemaya yooe, ki Israel teeb na kur din tuu teen daar kur piinii, a lin somm Yenjiantu ɲasaakak na yanyinna nan guura na. Niib na din tuu teen Liifai teeb na bi tora, ki Liifai teeb na mun teen mannteeb bi tora.

13

Bianjinba ki bi bokit bi mɔɲ nan boorganu

¹ Yoo nba ki bi din karin Moses sennu sanpaapo ki tur niib na, ki bi tan baar sobu na ni siar boor, ki li yet nan bii mi ki bin gaar Amonn koo Moab nirɔ ki wun pukin Yennu niib na po, ² kimaan Amonn nan Moab teeb na din ki tur Israel teeb na jeet nan nyun, baa din nyii Ijipt ki paa sonu paak na, ɲaan bi din pa likiriie ki tur Balam a wun mɔ Israel teeb mɔtont, ɲaan ki Yennu tunn mɔtont na ki li tee piisin. ³ Yoo nba ki bi din karin sennu na, ki Israel teeb gbat na, ki bi bokit bi mɔɲ nan boorganu nba kɔɔ namm na.

Bianjinba ki Nehemaya ɲamm niib na binber

⁴ Manntɔɔ nba ki bi yiu Eliasib, ki u gorii Yenjiantu ɲasaakak na tiat binbir boor na, din man nan Tobia ki li yukir bonchiann. ⁵ U din sak ki Tobia dɔɔ digbenir nba ni ki bi tuu birin Yenpiinii jeet nan bonnunubit, nan bona nba ki

bi sii dia tuun nann Yenjiantu nasaakak ni, nan Yenpiinii nba tee mannteeb yar, nan jeet piik ni yennkoo, nan li tiloonna daan nan li kpan nba ki bi teen Liifai teeb, ki bia teen Yenjiantu nasaakak na ni yanyinna, nan Yenjiantu nasaakak na guura na. ⁶ Laa din tun nna yoo nba, ki soo ki n kaa Jerusalem, kimaan Artaserses, wunba din tee Babilonn kpanbar na naan dinu bina piintaa nan njanlee nie, ki n din nmat wann n moŋ ki turɔ. Li din jii yoo waamewa ki u turin yaak, ⁷ ki n nmat Jerusalem. Li yooe ki n ji bann bonbiir nba ki Eliasib tun, kimaan waa chab Tobia diyoun, Yenjiantu nasaakak na ni, ki u doo na. ⁸ Ki n wutoor doo, ki n nyinn Tobia tiat kur ki lu, ⁹ ki tur moɓ a bin wuur namm diit na, ki jiiin koon Yenjiantu nasaakak na tiat nan Yenpiinii jeet nan bonnunubit na.

¹⁰ Ki n bia gbat nan Yenjiantu nasaakak na ni yanyinna, nan bi Liifai leeb nyik Jerusalem njan nmat bi kpaant ni, kimaan niib na ki teemm jeet nba janitibi. ¹¹ Ki n yakii nan toondamm na, nan baa njan ki nasaakak na biar yann na, njan ji te Liifai teeb nan yanyinna na nmat jen nasaakak na ni, ki namm piin bi toona. ¹² Ton, ki Israel teeb na kur namm piin ki baat nan bi jeet kur piik ni yennkoo, nan tiloonna daan nan kpan, ki koonn Yenjiantu nasaakak tiat diit na ni. ¹³ Ki n jii jab nba na ki sennib ki bi gorii tiat diit na: Namme tee Selemia, ki u tee manntoo, nan Sadok, ki u tee sennu banntoo, nan Pedaya, ki u tee Liifai nirɔ. Ki Hanann, wunba tee Sakur bija, njan tee Matania yaaboonn na din tee bi somntoo. N din mi nan jab nba nae ki n saa

teemm yada nan bi tee nimɔmm, ki sii biitir jeet fanu ki teen bi toontunleeb.

¹⁴ Yennu, tiat linba kur ki n teen ki tur a jiantu nasaakak na nan li toona.

¹⁵ Li yoo na ki n la niib be Juda ki n̄makii daan tilɔna, foon daar, ki siab paant jeet, nan daan, nan daan tilɔna, nan kinkana, nan jiklia bi bonii paak, ki saa nann Jerusalem; ki n kpaamm nan bi daa kɔi siar foon daar. ¹⁶ Nisiab din nyii Taya doo ni ki kɔɔ Jerusalem ki baat nan janii nan tabooru kur ki tan kɔi teen ti niib na foon daar. ¹⁷ Ki n yakii nan Juu teeb tɔondamm na ki yetib a, “Gotir bonbiir nba ki i tuun na. I kɔont foon daar na jakinte. ¹⁸ Linba na booru paake ki Yennu din dat i yeejamm tuba, yoo nba ki u din baar nan biiru, doo na paak na. N̄aan ki i bia lek yiab ki kɔont foon daar na jakint, ki te Yennu wutoor n̄amii do Israel teeb paak.”

¹⁹ Li paak ki n din tur mɔb nan bin tuu loon doo na tammɔkɔka na gana, foon daar kur, ki daa lootir ki tan tuu yoo nba ki foon daar saa gar. N din jii n jab na siabe ki bi guu tammɔi man, a bi daa te ki sɔɔ kɔɔ nan siar doo na ni, foon daari. ²⁰ Taar yomm koo munlee-e ki kpinkpenta nba kɔi tabooru kur na dɔɔr doo na joonn nanyer po nyiɔk, ki li saa yent foon daar. ²¹ Ki n yakii namm a, “Li ki mɔk nyɔsiat nan yin tuu baar ki dɔɔr lenj ki guu sanyiɔk yentu-u. Yi-i jikii n̄amm tun linba na, n saa baar nan mabire i paak.” Laa din nyii li yoo ki saa, bi ji din ki jen foon daari. ²² Ki n tur Liifai teeb na mɔb a bin n̄amm bi mɔn, ki saan kii guu tammɔi na, ki lin te foon daar na-ii tee kasii.

Yennu, ii tian n po, linba na paak, ki tinin ninbaauk, kimaan a lomm nba yab na paak.

²³ Li yoo na, ki n bia bann nan Juu jab na bonchiann koon poob, ki bi tee binba nyii Asdod nan Amonn nan Moab booru ni. ²⁴ Ki bi waas na bokir piak Asdod danmaan koo maboorganii, naan ji kan fit pak ti danmaami. ²⁵ Ki n yakii nan jab na ki porib mob, ki boob, ki gut bi yut, ki te bi lor molor Yennu sann ni nan nammm koo bi waas kan ban koon boorganu. ²⁶ Ki n betib a, "Li din tee boorganu bonpoi koonu paake ki kpanbar Solomonntun yanbomm. Njooe din tee kpanbarjaann ki gar kpanbara kur nba be digbanlia ni. Yennu din loono ki teeno Israel teeb kura kpanbar, naan u lek din tan tun yanbomm na booruwa. ²⁷ Ti wei i binben na naan yet Yennu mob, kii jiki koonnt boorganu bonpoi-i?"

²⁸ Joyada din tee mannteeb yudaano nba ki bi yiu Eliasib na bija, naan Joyada bonjai na yeno din koon Sanbalat wunba nyii Bef Horonn doo ni na bipooe. Li paake ki n te Joyada nyii Jerusalem.

²⁹ Yennu, tiat niib na nba biir mannteeb toona nan molor nba ki a din lor nan mannteeb nan Liifai teeb na.

³⁰ N nammm niib na ki nyinnib linba kur tee jakint niwa, ki turib sennii nba tee mannteeb nan Liifai teeb yar, ki li te soo kur mi u toonn.

³¹ N te ki bi sii baat nan daat nba ki bi sii jokin Yenpiinii nba ki bi baat nann na yoo nba jan, ki bia te niib na sii baat nan bi Yenpiinii nba tee binn ni jeet kur sinsinn jaauj.

Yennu, tiat linba na kur ki nammin.

Yennu Gbouj Moor
Bimoba: Yennu Gbouj Moor Bible

copyright © 2003 Wycliffe Bible Translators, Inc.

Language: Bimoba

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 21 Feb 2024 from source
files dated 29 Jan 2022

00d89ba0-4677-52d9-9bc5-aa3d7c5c966d